

PUISI D'AMURI

SPASIMU

...E fazzu vota e svota 'nta lu lettu,
nun pigghiu sonnu, 'un pozzu ripusari;
lu cori batti, 'un trovu mai risettu,
di 'n menti nun ti pozzu chiù livari.

Appena m'addummisciu, a l'impruvvisu
ti viu 'nta lu me sonnu accussí bedda,
mi sentu veramenti 'n paradisu
tu ed eu abbrazzati dintra 'sta vanedda.

Ma quannu grapu l'occhi scunzulatu
capisciu chi nun era la rialtà,
fu sulu un sonnu ed era 'nzucclaratu:
sunnarimillu arrè comu si fa?!

Ma speru chi la sira veni prestu
pi quantu m'addummisciu e poi ti sonnu
pi véniti a vasari lestu lestu,
picchí ti perdu appena spunta 'u jornu...

2008

‘NA PAROLA

Dicitimi, cu’ fu chi la ‘nvintau
‘sta parulicchia fatta cu lu meli?
Cu cinco littiricchi si furmau
‘sta cosa ch’è chiù granni di li celi.


Cunteni un saccu di significatu,
fa strùdiri li menti chiù ‘ccillenti
e cu’ è chi si ci ha misu e l’ha studiatu
ancora ‘un ci ha caputu quasi nenti.

Tutti li stati d’animu d’ ‘u munnu
li trovi nchiusi dintra ‘sta parola;
eu puru mi ci haiu misu e mi cunfunnu
picchi m’ammazza e puru mi cunzola.

A voti mi fa tristi e pinzirusu,
a voti allegru, leggiu e spinziratu,
oppuru mi fa véniri ‘u scurdusu
e di pinzeri quantu mi n’ha datu...

Ma forsi lu segretu lu capivi,
nun servi di studialla a tutti l’uri;
nun c’è ‘na liggi o cosa chi discrivi
chi sula dici tuttu... dici amuri.

2008



M'HÂ DIRI....

M'hâ diri cu' li sciogghi 'sti catini
chi tennu lu me cori 'ncatinatu?!
E lu vilenu dintra li me' vini
chi fici lu me sangu 'ntussicatu?!

M'hâ diri, ma cü' è chi mi li torna
li lacrimi, lu sonnu, 'u tempu persu?!
E tutti li mumentu, 'nteri jorna
e li prumissi fatti a l'universu?!

Li frasi ch'arrubbava a 'na canzuna,
pi poi cantalli a tia cu tantu amuri?!
Dimmillu tu, cü' è chi mi li duna?!
M'abbannunasti 'nta lu me duluri...

M'hâ diri cu' la sana 'sta firita
chi tuttu lu me sangu s'asciucou?
Cu' mi la conza tutta la me vita,
li me' prugetti... tuttu si sbirsau!

Ma cu' mi la pò dari 'na risposta?!
Eu soffru ed idda 'un c'è, nun si n'adduna
chi soffru ancora pi la so batosta:
mi poi aiutari tu, amica luna?

2008

SENZA SENZU

Macari avissi statu senza vista
p' 'un vidiri la to biddizza rara!
La 'ntisa, s' 'un avissi mancu chista,
p' 'un sèntiri la to vucidda cara.

Oppuru avissi statu senza vrazza
o senza manu, p' 'un t'accarizzari;
nun canuscissi focu chi m'ammazza
disidirannu ancòra d'abbrazzari.

Oppuru avissi statu senza "olfattu"
p' 'un séntiri l'oduri to 'nta l'aria;
si fussi senza vucca, senza tattù,
lu baciù to? Cunnanna 'mmaginària.

Inveci li me' senzi funziunanti
pinzannu a tia, s'affinanu chiossài;
nun si' chiù cca cu mia, tu si' distanti,
pi menzu d'iddi nun ti scordu mai.

Ma su' la me cunnanna maliditta,
su' fini, ma mi portanu scumpenzu,
mi fannu ricurdari 'sta scunfitta
chi senza tia, la vita 'un havi senzù.

2008

NUN V'AMMUCCIATI CHIÙ

Amicu Suli, ora poi affacciari
e nésciri darrè di la muntagna,
'sta russaria di 'n facci 'a poi livari
si splenni chiù di tia nun fari lagna.

Amica Luna, ora poi spuntari
e ti vâ vasi cu lu Mari to,
accetta 'sta scunfitta, ' un t'arrabbiari:
quann'è ch' 'un si ci pò, nun si ci pò.

E puru viatri Stiddi, chi faciti?
Darrè la Negghia scura v'ammucciati?
E sulu picchi' 'nzemmula splinniti
e a dari la so luci 'un ci arrivati?

Nun c'è bisognu chiù 'st'ammucciaredda,
nun vi 'nvidiàti chiù di 'sta criatura;
si ritirau d'un pezzu la me bedda,
putiti fari arrè la vostra fiura.

Amici mei vi pregu 'un v'arrabbiati
s'è bedda e pari un essiri divinu!"
Vi dicu sulu: "Si cusà m'aiutàti
a tènila pi sempri a mia vicinu?"

2008

